

EXD585 (Cy) (GL)

Llywodraeth Cymru

Rheoliadau'r Tafod Glas (Cymru) 2008 (fel y'u diwygiwyd) – Rheoliadau 10 a 28
Gorchymyn Symud Anifeiliaid (Cyfyngiadau) (Cymru) 2003 (fel y'i diwygiwyd) – Erthygl 5

Trwydded gyffredinol ar gyfer symud anifeiliaid o safle o fewn parth rheoli dros dro y tafod glas i safle arall o fewn yr un parth rheoli dros dro y tafod glas

Yr wyf i, arolygydd milfeddygol a benodwyd i'm swydd gan Weinidogion Cymru at ddibenion Rheoliadau'r Tafod Glas (Cymru) 2008 (fel y'u diwygiwyd) ("y Rheoliadau") a Gorchymyn Symud Anifeiliaid (Cyfyngiadau) (Cymru) 2003 (fel y'i diwygiwyd) ("y Gorchymyn") yn caniatáu, yn unol â'r amodau a ddisgrifir yn y Rhestr isod, symud anifeiliaid o safle o fewn parth rheoli dros dro y tafod glas i safle mewn lle arall yn yr un parth rheoli dros dro y tafod glas.

Daw'r Datganiad hwn i rym o 13:30 ar 07 Hydref 2025

Arolygydd Milfeddygol

Enw: Katherine Lumb

Llofnod: KL

Dyddiad: 7 Hydref 2025

Arolygydd Milfeddygol a benodwyd gan Weinidogion Cymru.

Rhestr o'r Amodau

Rhaid i unrhyw berson sy'n symud anifail o dan awdurdod y drwydded hon gydymffurfio â'r amodau canlynol.

1. Bydd anifail yr awdurdodir ei symud gan y drwydded hon yn cael ei symud o safle mewn parth rheoli dros dro y tafod glas i safle arall yn yr un parth rheoli dros dro y tafod glas.
2. Ni chaniateir symud anifail o dan y drwydded hon os yw'r safle y symudir yr anifail ohono neu safle'r cyrchfan yn destun hysbysiad cyfyngu ar safle'r tafod glas.
3. Yn union cyn y symudiad, rhaid i'r trwyddedai neu ei filfeddyg preifat archwilio unrhyw anifail sy'n cael ei symud o dan awdurdod y drwydded hon am arwyddion clinigol o haint y tafod glas. Os bydd anifail a archwilir neu anifail arall yn yr un safle yn dangos arwyddion a allai fod yn arwydd o haint y tafod glas, ni chaniateir symud unrhyw anifail o'r safle hwnnw o dan y drwydded hon. Dylid ynysu'r anifail sy'n dangos yr arwyddion oddi wrth weddill y fuches/diadell. Rhaid i chi roi gwybod i APHA ar unwaith os amheuir bod achos o'r tafod glas.
4. Rhaid i'r trwyddedai sicrhau, yn union cyn llwytho'r anifeiliaid, fod gofynion amod 6 wedi eu bodloni.
5. Ar ôl dadlwytho anifeiliaid, a chyn i'r cerbyd adael safle'r cyrchfan, rhaid i'r trwyddedai sicrhau bod gofynion amod 6 wedi eu bodloni.
6. Y gofynion y cyfeirir atynt yn amodau 4 a 5 yw:
 - a) Bod rhan y cerbyd lle delir yr anifeiliaid yn cael ei glanhau'n ddigonol, gan sicrhau ei bod yn rhydd o ddeunydd organig a allai ddenu gwybed, cyn ei thrin yn unol ag is-baragraff b.
 - b) Rhaid i ran y cerbyd lle delir yr anifeiliaid fod wedi ei thrin â phryfladdwr yn unol â'r label.
 - c) Rhaid gadael i unrhyw bryfladdwr a ddefnyddir sychu'n llwyr cyn llwytho unrhyw anifeiliaid. Dylai pawb sy'n dibynnu ar y drwydded hon fod yn fodlon bod hyn wedi'i wneud.
7. Rhaid i'r symudiad i safle'r cyrchfan fod yn uniongyrchol, ar briffyrdd cyhoeddus, ac ar y llwybr y bernir sy'n debygol o fod y cyflymaf sydd ar gael.
8. Ni chaniateir casglu na gollwng mewn sawl man wrth eu cludo.
9. Rhaid i'r trwyddedai sicrhau bod systemau cadw cofnodion yn eu lle er mwyn sicrhau y gellir olrhain pob symudiad o'r safle cychwynnol i safle'r cyrchfan.
10. Rhaid i'r trwyddedai gadw, am gyfnod o 2 flynedd o leiaf, gofnodion o:
 - a. Nifer yr anifeiliaid a symudwyd o dan y drwydded hon,
 - b. Rhifau adnabod yr anifeiliaid a symudwyd o dan y drwydded hon,
 - c. Manylion cywir y safle y symudwyd yr anifeiliaid iddo.
 - d. Unrhyw bryfladdwr a ddefnyddiwyd at ddiben amod 6.
11. Wrth symud unrhyw beth o dan awdurdod y drwydded hon, rhaid i unigolyn gario nodyn cludo. Rhaid i'r nodyn cludo gynnwys:
 - a. rhywogaeth a nifer yr anifeiliaid sy'n cael eu symud,
 - b. dyddiad y symudiad,
 - c. enw'r cludwr,
 - d. cyfeiriad y safle lle dechreuodd y symudiad,
 - e. enw'r sawl sy'n derbyn y llwyth
 - f. cyfeiriad safle'r cyrchfan.

Nodiadau

1. Ystyr "y Rheoliadau" yw Rheoliadau'r Tafod Glas (Cymru) 2008 (fel y'u diwygiwyd) (O.S. 2008/1090) (Cy. 116)
 2. Ystyr "y Gorchymyn" yw Gorchymyn Symud Anifeiliaid (Cyfyngiadau) (Cymru) 2003 (fel y'i diwygiwyd) (O.S. 2003/399) (Cy. 56)
 3. Ystyr "anifail" yw anifail sy'n cnoi cil, neu gamelid. Mae anifeiliaid sy'n cnoi cil yn cynnwys gwartheg, defaid, geifr a cheirw, ymhlith anifeiliaid eraill. Mae camelidau yn cynnwys camelod, lamas ac alpacas, ymhlith anifeiliaid eraill.
 4. Ystyr "Parth Rheoli Dros Dro y tafod glas" yw parth rheoli dros dro gafodd ei ddatgan o dan reoliad 10(1) o'r Rheoliadau.
 5. Ystyr "trwyddedai" yw'r person sy'n symud anifeiliaid o dan y drwydded hon.
 6. Nid yw'r drwydded hon yn drech nag unrhyw gyfyngiadau symud eraill ar anifeiliaid o dan ddeddfwriaeth arall.
 7. Ni chaniateir defnyddio'r drwydded hon i symud anifeiliaid allan o barth rheoli dros dro y tafod glas, ac eithrio pan fo'n rhesymol, ac y gellir cyfiawnhau hynny, bod y cerbyd yn mynd y tu allan i'r parth rheoli dros dro (heb stopio mewn unrhyw safle) ar ei lwybr i safle'r cyrchfan yn yr un parth rheoli dros dro y tafod glas.
 8. Rhaid i'r pryfladdwr a ddefnyddir ar gerbydau a ddefnyddir i gludo anifeiliaid a symudir o dan awdurdod y drwydded hon fod yn effeithiol, yn unol â chyfarwyddiadau'r gwneuthurwr, yn erbyn pryfed hedfan, yn ddelfrydol Culicoides (gwybed). Yn ddelfrydol dylai gynnwys y cynhwysyn actif pyrethrin, neu byrethroidau synthetig. Yn ddelfrydol, dylid ei ddefnyddio ar ffurf chwistrell a dylai fod yn addas i'w ddefnyddio o dan do. Rhaid iddo fod wedi'i awdurdodi ar y pryd gan yr Awdurdod Gweithredol Iechyd a Diogelwch (HSE) fel cynnyrch bioladdol i'w ddefnyddio yn y DU, naill ai o dan y Rheoliadau Rheoli Plaladdwyr neu'r Rheoliadau Cynhyrchion Bioladdol.
- Dylai'r trwyddedai ddarllen cyfarwyddiadau'r gwneuthurwr ar gyfer defnyddio'r cynnyrch ar gerbyd a ddefnyddir i gludo anifeiliaid sy'n cael eu symud o dan awdurdod y drwydded hon, a chadw atynt.
- Mae'r rhestr o gynnyrch i'w gweld yma (DOLEN).
- Cynhyrchion bioladdol a gymeradwyir gan y Rheoliadau Rheoli Plaladdwyr (HSE):
- <https://www.hse.gov.uk/biocides/copr/approved.htm>
- Cynhyrchion bioladdol a gymeradwyir gan y Rheoliadau Cynhyrchion Bioladdol (HSE):
- <https://www.hse.gov.uk/biocides/uk-authorised-biocidal-products.htm>
9. Nid oes unrhyw beth yn y Drwydded hon yn dileu rhwymedigaethau'r defnyddiwr o dan Orchymyn Cludo Anifeiliaid (Glanhau a Diheintio) (Cymru) (Rhif 3) 2003 (O.S. 2003/1968 (Cy.213)) i lanhau a diheintio'r cerbyd.
 10. Rhaid cadw at holl ofynion Gorchymyn Rheoli Clefydau (Cymru) 2003 (fel y'i diwygiwyd) (O.S. 2003/1966 (Cy.211)) a holl ofynion trwyddedau'r Gorchymyn hwnnw.

11. Mae pob symudiad yn amodol ar y gofyniad bod yr anifeiliaid wedi eu hadnabod yn briodol a bod y ddogfennaeth symud sy'n mynd gyda hwy wedi ei chwblhau yn briodol. Rhaid i symudiadau gydymffurfio â gofynion gwaharddiadau symud ac adrodd arferol.
12. Rhaid i berson sy'n symud unrhyw beth o dan awdurdod y drwydded hon roi ei enw a'i gyfeiriad, dangos y nodyn cludo a chaniatáu i rywun wneud copi o'r nodyn cludo neu o ran ohono, os gofynnir iddo wneud hynny gan arolygydd neu un o swyddogion eraill Gweinidogion Cymru.
13. Mae pob symudiad yn amodol ar y gofyniad bod yr anifeiliaid wedi eu hadnabod yn briodol a bod y ddogfennaeth symud sy'n mynd gyda hwy wedi ei chwblhau yn briodol. Yn achos gwartheg, dyma'r pasbort ac ar gyfer rhywogaethau eraill y ffurflen AML berthnasol wedi'i chwblhau. Rhaid rhoi gwybod am y symudiadau hefyd o fewn 3 diwrnod - i BCMS yn achos gwartheg (naill ai drwy ddefnyddio CTS-ar-lein neu drwy lenwi a phostio un o'r cardiau symud yn y pasbort) ac i'r awdurdod lleol ar gyfer rhywogaethau eraill (drwy anfon copi o'r ffurflen AML i'r Awdurdod Lleol). Gellir rhoi gwybod am symudiadau defaid, geifr a cheirw ar-lein hefyd. gan ddefnyddio'r Gwasanaeth Gwybodaeth Da Byw (LIS).
14. Rhaid i systemau cadw cofnodion fod ar waith er mwyn sicrhau y gellir olrhain pob symudiad o'r safle cychwynnol i safle'r cyrchfan.
15. Os ydych chi'n amau bod achos o glefyd hysbysadwy yng Nghymru, rhaid ichi roi gwybod i'r Asiantaeth Iechyd Anifeiliaid a Phlanhigion ("APHA") ar unwaith, ar 03003 038 268.
16. Rhaid cydymffurfio â phob deddfwriaeth berthnasol arall.
17. Cysylltwch ag APHA ar y rhif uchod, neu â'ch Awdurdod Lleol, i gael rhagor o gyngor ynghylch mesurau bioddiogelwch ac unrhyw ddeddfwriaeth berthnasol arall a all fod yn berthnasol.

Bydd unrhyw berson sy'n torri unrhyw ofyniad neu waharddiad mewn datganiad a wneir o dan Reoliadau 2008 yn cyflawni trosedd a gall fod yn atebol os caiff ei farnu'n euog i ddirwy lefel 5 ar y raddfa safonol neu i garchar am gyfnod nad yw'n fwy na thri mis neu i'r ddau (yn rhinwedd rheoliad 25 o Reoliadau 2008).

Bydd unrhyw berson sy'n torri unrhyw ofyniad neu waharddiad mewn datganiad a wneir o dan Orchymyn 2003 yn euog o drosedd a gall fod yn atebol os ceir euogfarn ddiannod i garchar am gyfnod nad yw'n hwy na chwe mis neu i ddirwy nad yw'n fwy na

lefel 5 ar y raddfa safonol neu i'r ddau (yn rhinwedd adran 72 o Ddeddf Iechyd Anifeiliaid 1981).